

Na osnovu člana 22 Statuta Brčko distrikta BiH («Službeni glasnik Brčko distrikta BiH» broj 3/07), Skupština Brčko distrikta BiH na 43. sjednici održanoj 28. februara 2007. godine, usvaja

ZAKON

O KLASIFIKACIJI DJELATNOSTI

U BRČKO DISTRIKTU BiH

DIO PRVI - OSNOVNE ODREDBE

Član 1

(Predmet ovog zakona)

Ovim zakonom se utvrđuje pojam klasifikacije djelatnosti u Brčko distriktu BiH (u daljnjem tekstu: KD), značaj i cilj zakona, primjena zakona i donošenje Odluke o klasifikaciji djelatnosti u Brčko distriktu BiH.

Član 2

(Definicija KD)

Klasifikacija djelatnosti je obavezan standard koji se upotrebljava pri evidentiranju, prikupljanju, obradi, analiziranju, publiciranju i iskazivanju podataka po djelatnostima značajnim za praćenje stanja i kretanja na ekonomskom, demografskom i socijalnom području u Brčko distriktu BiH.

DIO DRUGI – OPĆE ODREDBE I DONOŠENJE ODLUKE O KLASIFIKACIJI DJELATNOSTI U BRČKO DISTRIKTU BiH

POGLAVLJE I - OPĆE ODREDBE

Član 3

(Osnova KD)

(1) Klasifikacija djelatnosti se zasniva na “Statističkoj nomenklaturi ekonomskih aktivnosti Evropske unije NACE Rev. 1.1.” (Propis EEC broj 29/02) i uporediva je s međunarodnom klasifikacijom djelatnosti Ujedinjenih nacija (ISIC Rev. 3).

(2) Klasifikacija djelatnosti se stalno usklađuje sa svim zvaničnim promjenama Statističke nomenklature ekonomskih aktivnosti Evropske unije, a time i s međunarodnom klasifikacijom djelatnosti Ujedinjenih nacija.

Član 4

(Primjena KD)

Klasifikacija djelatnosti se primjenjuje:

- a) u praćenju promjena u ekonomiji i za donošenje mjera ekonomske i socijalne politike;
- b) u službenoj statistici, sistemu informisanja, evidenciji i planiranju razvoja;
- c) u prikupljanju, obradi i objavi podataka prema djelatnostima;
- d) sklapanju ugovora i izvršavanju međunarodnih obaveza;
- e) u naučnoistraživačkom i analitičkom radu;
- f) za upis djelatnosti u statističke, administrativne, sudske i registre posebnih namjena.

POGLAVLJE II - DONOŠENJE ODLUKE O KLASIFIKACIJI DJELATNOSTI BRČKO DISTRIKTA BiH

Član 5

(Donošenje i sastavni dio Odluke o klasifikaciji djelatnosti u Brčko distriktu BiH)

(1) Odluku o klasifikaciji djelatnosti u Brčko distriktu BiH donosi gradonačelnik Brčko distrikta BiH, na prijedlog nadležnog organa Bosne i Hercegovine koji obavlja poslove statistike za potrebe Brčko distrikta BiH (u daljnjem tekstu: nadležni organ).

(2) Odluka o klasifikaciji djelatnosti u Brčko distriktu BiH je usklađena s Odlukom o klasifikaciji djelatnosti u BiH koju je donijela Agencija za statistiku BiH.

(3) Sastavni dio Odluke iz stava 1 ovog člana čine:

- a) Klasifikacija djelatnosti Brčko distrikta BiH;
- b) Klasifikacija djelatnosti Brčko distrikta BiH s objašnjenjima.

Član 6

(Usaglašavanje KD)

(1) Nadležni organ može predlagati razradu klasifikacije djelatnosti na nivou podrazreda.

(2) Razrada klasifikacije djelatnosti iz stava 1 ovog člana može se vršiti jedanput godišnje.

(3) Prijedlozi razrade dostavljaju se Agenciji za statistiku BiH do 1. septembra tekuće godine.

(4) Nadležni organ je dužan usaglasiti prijedloge razrade na nivou podrazreda s Agencijom za statistiku BiH i entitetskim zavodima.

DIO TREĆI - PRIMJENA KD I STATISTIČKI REGISTRI

POGLAVLJE I - PRIMJENA KD

Član 7

(Upotreba KD)

Klasifikacija djelatnosti se upotrebljava za određivanje djelatnosti, odnosno sva razvrstavanja po djelatnostima poslovnih i drugih subjekata i njihovih dijelova za potrebe statistike, različitih službenih i drugih administrativnih zbirki podataka (evidencije, registri, baze podataka i sl.).

Član 8

(Hijerarhijske kategorije KD)

Klasifikacija djelatnosti ima slijedeće hijerarhijske kategorije grupisanja privrednih i drugih djelatnosti:

- a) područje (označeno jednoslovnim abecednom šifrom);
- b) potpodručje (označeno dvoslovnim abecednom šifrom);
- c) oblast (označena dvocifrenom broječanim šifrom);
- d) grana (označena trocifrenom broječanim šifrom);
- e) razred (označen četverocifrenom broječanim šifrom);
- f) podrazred (označen peterocifrenom broječanim šifrom).

Član 9

(Razvrstavanje po djelatnostima)

Prema KD razvrstavaju se po djelatnostima:

- a) pravna i fizička lica i njihovi dijelovi koji obavljaju djelatnost u skladu sa zakonskim propisima;
- b) organi vlasti, uprave na nivou države i entiteta;
- c) organi vlasti i uprave na nivou Brčko distrikta BiH.

Član 10

(Nadležni organi za razvrstavanje subjekata po djelatnostima)

Razvrstavanje po djelatnostima subjekata iz člana 9 ovog zakona, u skladu sa KD vrši nadležni organ u skladu sa zakonima i drugim propisima Brčko distrikta BiH i Bosne i Hercegovine.

Član 11

(Nivoi razvrstavanja i razvrstavanje prema pretežnoj djelatnosti)

(1) Subjekti iz člana 9 ovog zakona i njihovi dijelovi razvrstavaju se u područja, potpodručja, oblasti, grane, razrede i podrazrede KD, prema djelatnostima koje obavljaju.

(2) Ako poslovni subjekti iz stava 1 ovog člana obavljaju više djelatnosti, razvrstavaju se prema djelatnosti koju pretežno obavljaju.

(3) U svim slučajevima međunarodne razmjene podataka subjekti iz člana 9 ovog zakona se razvrstavaju do nivoa razreda, zavisno od zahtijevanog nivoa agregacije.

(4) Za svrhe produkcije i objavljivanja statističkih rezultata namijenjenih domaćim korisnicima, subjekti iz člana 9 ovog zakona se razvrstavaju do nivoa podrazreda, zavisno od zahtijevanog nivoa agregacije.

POGLAVLJE II - STATISTIČKI REGISTRI

Član 12

(Nadležni organ za vođenje statističkih registara)

(1) Nadležni organ vodi statistički registar subjekata iz člana 9 ovog zakona u skladu sa KD.

(2) Metodološke osnove statističkog registra utvrđuje nadležni organ u skladu s međunarodnim standardima i standardima Evropske unije.

Član 13

(Vođenje statističkog registra)

(1) Uz prijavu za registraciju, odnosno uz prijavu promjene podataka upisanih u statistički registar, subjekti iz člana 9 ovog zakona podnose nadležnom organu podatke utvrđene metodološkim osnovama statističkog registra uz prethodno pribavljeno rješenje o upisu u sudski registar.

(2) Za subjekte koji ne podliježu obavezi upisa u sudski registar podatke iz stava 1 ovog člana dostavljaju organi koji vode evidenciju tih podataka.

Član 14

(Obavješćavanje o promjeni podataka u statističkom registru)

(1) Nadležni organ dužan je obavijestiti subjekte iz člana 9 ovog zakona o razvrstavanju po djelatnostima i o promjeni podataka u statističkom registru.

(2) Subjekti upisa u sudski registar kod usklađivanja djelatnosti s Odlukom o klasifikaciji djelatnosti Brčko distrikta BiH oslobađaju se plaćanja sudske takse.

DIO ČETVRTI - PRIJELAZNE I ZAVRŠNE ODREDBE

Član 15

(Objavljivanje Odluke o klasifikaciji djelatnosti u Brčko distriktu BiH)

Odluka o klasifikaciji djelatnosti u Brčko distriktu BiH objavit će se u «Službenom glasniku Brčko distrikta BiH».

Član 16

(Prestanak važenja Zakona o standardnoj klasifikaciji djelatnosti u Brčko distriktu BiH)

Stupanjem na snagu ovog zakona stavlja se van snage Zakon o standardnoj klasifikaciji djelatnosti u Brčko distriktu BiH («Sl. glasnik Brčko distrikta BiH» brojevi 4/01 i 8/02).

Član 17

(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku Brčko distrikta BiH".

Broj: 0-02-022-23/07

Brčko, 28. februar 2007. godine

PREDSJEDNIK

SKUPŠTINE BRČKO DISTRIKTA BiH

Prof. dr. Milan Tomić, s.r.